



Cu artistanan Levi Silvanie y Janiro 'Ataniró'
Eisden como protagonista

Minister Endy Croes a lansa e proyecto 'School Tour' pa yuda atende cu problema di salud mental

ORANJESTAD (AAN): Diaranson durante un conferencia di prensa minister di Enseñanza Endy Croes a anuncia lansa di un proyecto pa scolnan secundario yama 'School Tour', pa crea concientizacion riba salud mental y salud personal.

Durante e conferencia di prensa e mandatario a trece dilanti cu

e proyecto ta uno hopi bunita y importante.

"E protagonistanan principal den e proyecto aki artistanan conoci Levi Silvanie y Janiro 'Ataniró' Eisden".

Esaki ta un proyecto musical pa crea concientizacion riba salud mental y cuidu personal na scolnan secundario, segun Croes.

E mandatario a splica cu den luna di November di 2022 el a haya un yamada pa bay wak un presentacion y Friso Veenman a bin cu e proyecto aki y a splica con e ta hinc den otro.

Un di e partinan cu Veenman a splica ta cu atravez di musico e hobennan lo habri mas y expresa nan dolor, pa conta di nan problema.

Segun Croes, e proyecto ta bay ta riba 3 maña pa e muchanan di scol, mientras cu lo tin sessionnan tambe pa adultonan.

"E team ta consisti entre otro di representantenan di Respaldo, AZV, Patiententraad, GGZ y Stichting Hunto". E ta un otro manera pa nos por tackle e problema di salud mental. Ta un problema cu despues di e pandemia nos a haya mas conocimiento di dje tambe, segun Croes.

El a sigui bisa cu quizas awor e muchanan ta 'open up', mas facil asina.

Segun e mandatario, tin hopi mucha cu por ta biba den trauma y problema y no sa cu kende nan papia y con nan trece esaki dilanti.

"Mi ta contento cu no ta solamente mi ministerio di Enseñanza y Deporte a braza e proyecto aki, sino mi colega minister di Asuntonan Social Rocco Tjon tambe ta duna su aporte na e proyecto aki".

Hunto nos por atende cu e problema di salud mental na diferente manera, segun e mandatario.

El a splica cu riba 16, 17 y 18 di October ta bay tin 3 mainta unda cu School Tour ta bay ta activo na Filomena College, Maria College y Colegio Arubano.

Esey ta e tres prome scolnan cu lo forma parti di e proyecto, unda cu ta bay tin cantamentu, pero papiamento tambe.